

AKASHVANI (AIR)
RNU : KOLKATA
Bengali Text Bulletin

Date: 13.07.2024

Time: 7.50 P.M.

বিশেষ বিশেষ খবর –

- ১) রাজ্যে চারটি বিধানসভা আসনের উপনির্বাচনে বিপুল ব্যবধানে জয়ী তৃণমূল কংগ্রেস।
তৃণমূল নেত্রী বলেছেন, এই জয় মানুষের।
সাংগঠনিক দুর্বলতা ছিল কিনা, খুঁজে দেখবে বিজেপি।
 - ২) নতুন ফৌজদারি আইনের ওপর আলোচনার জন্য বিধানসভার আগামী অধিবেশনে একটি প্রস্তাব আনা হবে বলে মুখ্যমন্ত্রী জানিয়েছেন।
 - ৩) রাজ্য সরকার, প্রধান মন্ত্রী আবাস যোজনার অসম্পূর্ণ থাকা প্রায় ১৫ হাজার বাড়ি তৈরির কাজ আগস্ট মাসের মধ্যে শেষ করবে।
 - ৪) দক্ষিণবঙ্গে কৃষি জমিতে জলের যোগান অব্যাহত রাখতে রাজ্য সরকার, জল সেচ ব্যবস্থাকে আরও মজবুত করতে উদ্যোগী হয়েছে।
 - ৫) পশ্চিম মেদিনীপুরের ডেবরায় সেপটিক ট্যাঙ্কে লুকিয়ে রাখা চোলাই মদের সরঞ্জাম বের করতে গিয়ে এক নাবালক সহ তিন জনের মৃত্যু।
 - ৬) কলকাতা ফুটবল লীগে মরশুমের প্রথম ডার্বিতে মোহনবাগানকে ২-১ গোলে হারিয়ে জয়ী ইস্টবেঙ্গল।
-

রাজ্যের চারটি বিধানসভা আসনের উপনির্বাচনে ক্ষমতাসীন তৃণমূল কংগ্রেস চারটিতেই বিপুল ব্যবধানে জয়ী হয়েছে। রায়গঞ্জ, বাগদা এবং রানাঘাট দক্ষিণ এই তিনটি কেন্দ্র তৃণমূল কংগ্রেস, বিজেপির কাছ থেকে ছিনিয়ে নিয়েছে। সদ্য লোকসভা নির্বাচনেও এই তিনটি বিধানসভা খন্ডেই বিজেপি এগিয়ে ছিল।

কলকাতার মানিকতলা বিধানসভা কেন্দ্র আগে থেকেই তৃণমূল কংগ্রেসের দখলে ছিল। এই চার কেন্দ্রের উপনির্বাচনে আজ ভোট গণনা করা হয়। উপনির্বাচনের ফলাফল নিয়ে আমাদের সংবাদদাতার একটি প্রতিবেদন,

ভয়েসকাস্ট অভিরূপ

সাত রাজ্যের ১৩টি বিধানসভা আসনের উপনির্বাচনে মাত্র ২টি আসনে জয়ী হয়েছে বিজেপি। ১০ টি আসনে জয়ী হয়েছেন ইন্ডি জোটের প্রার্থীরা। একটি গেছে নির্দল প্রার্থীর দখলে।

উপনির্বাচনে আজকের ফলাফল নিয়ে তৃণমূল কংগ্রেস প্রধান, মুখ্যমন্ত্রী মমতা ব্যানার্জী জয়ী প্রার্থীদের শুভেচ্ছা জানিয়ে বলেছেন, এই জয় তাদের সামাজিক দায়বদ্ধতাকে আরও বাড়িয়ে দিয়েছে। এজেন্সি দিয়ে মানুষকে ভয় দেখানো হলেও সেটা তারা রুখে দিয়েছেন বলে তিনি মন্তব্য করেন। মহারাষ্ট্র সফর শেষে আজ কলকাতা বিমানবন্দরে পৌঁছে মুখ্যমন্ত্রী বলেন,

বাইট

আগামী ২১ শে জুলাই শহীদদের স্মৃতির উদ্দেশে এই জয় উৎসর্গ করা হবে বলে মুখ্যমন্ত্রী জানান।

পয়লা জুলাই চালু হওয়া নতুন ফৌজদারি আইনের ওপর আলোচনার জন্য বিধানসভার আগামী অধিবেশনে একটি প্রস্তাব আনা হবে বলে তিনি জানিয়েছেন। পাশাপাশি এই আইন পর্যালোচনার দাবিও তুলেছেন তিনি।

মুখ্যমন্ত্রী বলেন, অনেকের কাছেই নতুন আইন সম্পর্কে ধারণা স্পষ্ট নয়।

বিজেপি রাজ্যে চার বিধানসভা কেন্দ্রের উপনির্বাচনে পরাজয়ের কারণ পর্যালোচনা করবে বলে দলের রাজ্য মুখপাত্র, রাজ্যসভার সাংসদ শমীক ভট্টাচার্য জানিয়েছেন। কলকাতায় আজ এক সাংবাদিক বৈঠকে তিনি দলের পরাজয়ের কারণ হিসাবে সাংগঠনিক দুর্বলতাকে অন্যতম কারণ হিসাবে উল্লেখ করেন। তবে, মানুষকে ভোট দিতে বাধা দেওয়া, সন্ত্রাস এবং বারবার নির্বাচন কমিশনকে জানানো সত্ত্বেও কেন্দ্রীয় বাহিনীকে সঠিকভাবে ব্যবহার করা হয়নি বলেও শমীক বাবু অভিযোগ করেন।

বাইট

বিধানসভা উপনির্বাচনের এই ফলাফল জনমতের প্রতিফলন নয় বলে রাজ্য বিজেপি সভাপতি সুকান্ত মজুমদার মন্তব্য করেছেন। ২০১৬-র নির্বাচনে দল ঘুরে দাঁড়াবে বলে আজ খড়গপুরে একটি দলীয় কার্যক্রমে যোগ দিয়ে তিনি প্রত্যয় ব্যক্ত করেন।

বাইট

রাজ্য সরকার, প্রধানমন্ত্রী আবাস যোজনার অসম্পূর্ণ থাকা প্রায় ১৫ হাজার বাড়ি তৈরির কাজ আগামী অগাস্ট মাসের মধ্যে শেষ করবে। রাজ্যের পঞ্চায়েত মন্ত্রী প্রদীপ মজুমদার আকাশবাণীকে জানিয়েছেন, এপর্যন্ত আবাস প্রকল্পে মোট ৩৪ লক্ষ ৬৭ হাজার ৬৫১টি বাড়ি অনুমোদন দেওয়া হয়েছে এবং টাকা প্রদান করা হয়েছে। এর মধ্যে ৩৪ লক্ষ ১১ হাজার ৯৭৭টি বাড়ির নির্মাণ কাজ সম্পূর্ণ হয়েছে। অবশিষ্ট ৫৫ হাজার ৬৭৪ টি বাড়ির মধ্যে ৪০ হাজার ৮৬৩টি বাড়ি বিভিন্ন কারণে সম্পূর্ণ করা হবে না। উপভোক্তার মৃত্যু, স্থায়ী স্থানান্তর, জমি সংক্রান্ত আইনি জটিলতা, উপভোক্তার অর্থনৈতিক কারণে অপারগতাই মূল কারণ। বাকি ১৪ হাজার ৮১১টি বাড়ির নির্মাণ কাজ এখনও অসম্পূর্ণ। তা আগামী মাসের মধ্যেই শেষ হয়ে যাবে। পঞ্চায়েত মন্ত্রী আরও জানান প্রধানমন্ত্রী আবাস যোজনায় এ রাজ্যে মোট অনুমোদিত বাড়ির ৯৮% তৈরির কাজ শেষ হয়েছে।

দক্ষিণবঙ্গের জেলাগুলিতে বৃষ্টিপাতের ব্যাপক ঘাটতির প্রেক্ষিতে কৃষিজমিতে জলের যোগান অব্যাহত রাখতে রাজ্য সরকার জলসেচ ব্যবস্থাকে আরো মজবুত করতে উদ্যোগী হয়েছে। সামগ্রিক পরিস্থিতি পর্যালোচনা করতে জলসম্পদ অনুসন্ধান দফতর আগামী ২২ জুলাই বিশেষ বৈঠক ডেকেছে। দফতরের মন্ত্রী মানস ভুঁইয়া জানান, ওই বৈঠকে বিভিন্ন জেলায় ভূগর্ভস্থ জলের বর্তমান পরিস্থিতি খতিয়ে দেখা হবে। কৃষি দফতরের সঙ্গে আলোচনা করে চাষীদের স্বার্থে কি ব্যবস্থা নেওয়া যায় তাও দেখা হবে। এ ব্যাপারে জেলাগুলির কাজ থেকে বিস্তারিত রিপোর্ট চাওয়া হয়েছে। জলসম্পদমন্ত্রী আরো জানান, রাজ্যের মোট সেচসেবিত জমির ৭৬ শতাংশে জল সরবরাহের দায়িত্ব তাঁর দফতরের। এক্ষেত্রে মোট কৃষি জমির পরিমাণ ৫৭ লক্ষ হেক্টর। বিভিন্ন বাঁধের জলাধার থেকে সেচখালের মাধ্যমে কিছু জমিতে জল পৌঁছে দেওয়া হয়। বর্তমান বৃষ্টি

ঘাটতির পরিস্থিতিতে চাষিরা যাতে কোনও সমস্যায় না পড়েন তা নিশ্চিত করতে হবে বলে মুখ্যমন্ত্রী নির্দেশ দিয়েছেন। এই নির্দেশ কার্যকর করার জন্য সবরকম ব্যবস্থা নেওয়া হবে।

এদিকে, বাজারে সজির দাম নিয়ন্ত্রণে আনতে আজ জলপাইগুড়ির মাল মহকুমার ওদলাবাড়ি, ক্রান্তি সহ বিভিন্ন সবজির মান্ডি ও বাজার পরিদর্শন করে স্পেশাল টাস্কফোর্স। উপস্থিত ছিলেন ডেপুটি ম্যাজিস্ট্রেট দিলীপ বিশ্বাস, জয়েন্ট বিডিও সঞ্জয় দত্ত, পুলিশ আধিকারিক সহ অন্যান্যরা।

কলকাতা হাইকোর্ট, দক্ষিণ ২৪ পরগনার তোলাহাটে মৃত যুবক আবু সিদ্দিক হালদারের ময়নাতদন্তের রিপোর্ট জমার নির্দেশ দেওয়ার পরে আজ ফের তার দেহ কবর থেকে তোলা হয়। কলকাতার এন আর এস হাসপাতালে আবু সিদ্দিকের দ্বিতীয় ময়নাতদন্তের জন্য দেহ নিয়ে যাওয়া হয়েছে। মন্দিরবাজারের ডিএসপি সুবীর বাগ, মৃতের বাবা ছাড়াও উপস্থিত আছেন এক বিচার বিভাগীয় ম্যাজিস্ট্রেট। এলাকায় বিশাল পুলিশ বাহিনী মোতায়েন করা হয়েছে।

এই পোস্টমর্টেমের ভিডিওগ্রাফির ফুটেজ সংরক্ষণ ও ভিসেরা পরীক্ষার নমুনা কেন্দ্রীয় ফরেনসিক ল্যাবরেটরিতে পাঠানোর নির্দেশ দিয়েছে কলকাতা হাইকোর্ট।

পশ্চিম মেদিনীপুরের ডেবরায় সেপটিক ট্যাঙ্কে মজুত চোলাই মদ তৈরীর কাঁচামাল বের করতে গিয়ে এক নাবালকের মৃত্যু হয়েছে। তাঁকে উদ্ধার করতে নেমে প্রাণ হারিয়েছেন আরও দুজন। খানামোহন অঞ্চলের চকরাধাবল্লভপুর এলাকার বাসিন্দা,

চোলাই মদের কারবারি রবি হেমব্রম, আবগারি দফতরের হাত থেকে বাঁচার জন্য বাড়ির পেছনে সেপটিক ট্যাঙ্কে সব সরঞ্জাম লুকিয়ে রাখত বলে অভিযোগ। আজ সকালে ১৬ বছরের সুজন সরেন কাঁচামাল বের করতে সেখানে নামে। বিষাক্ত গ্যাসে ট্যাংকের ভিতর অসুস্থ হয়ে পড়ে সে। তাকে উদ্ধার করতে নেমে ৫৫ বছরের বদ্যিনাথ হেমব্রম ও ৪৫ বছরের বাপি বাস্কে নামে দুই ব্যক্তিও অসুস্থ হয়ে পড়েন। স্থানীয়দের প্রচেষ্টায় তিন জনকেই উদ্ধার করে ডেবরা হাসপাতালে নিয়ে যাওয়া হলে চিকিৎসকরা তাদের মৃত ঘোষণা করেন।

রিল বানাতে গিয়ে পশ্চিম বর্ধমানের অভালের ১২ নং রেল কলোনি এলাকায় এক যুবতী আজ দামোদরের জলে তলিয়ে গেছেন। জানা গেছে, জ্যোতি কুমারী, বিউটি কুমারী ও প্রিয়াঙ্কা কুমারী নামে তিন যুবতী রিল বানানোর সময়, অসাবধানতা বশতঃ প্রিয়াঙ্কা নদীতে পড়ে যান। তাঁকে বাঁচাতে জলে ঝাঁপ দেয় জ্যোতি ও বিউটি। প্রিয়াঙ্কা পাড়ে উঠে এলেও বাকী দুজন তলিয়ে যায়। স্থানীয়দের সহযোগিতায় বিউটিকে অচৈতন্য অবস্থায় উদ্ধার করে হাসপাতালে নিয়ে যাওয়া হয়। জ্যোতির খোঁজে চলছে তল্লাশি।

এদিকে, গত সন্ধ্যায় পায়ে লাগা কাদা ধুতে নেমে ফুলবাড়ির মহানন্দা নদীর জলে তলিয়ে গেছেন শিলিগুড়ির রাঙ্গাপানির বাসিন্দা এক যুবক। ২৪ ঘন্টা কেটে গেলেও তাঁর সন্ধান মেলেনি।

কলকাতার হাতিবাগান এলাকায় বিধানসরণী ও কাশী বোস লেনের সংযোগস্থলে জল সরবরাহের জন্য মাটি খুঁড়তে গিয়ে এক মহিলার পচাগলা দেহ উদ্ধারের ঘটনায় চাঞ্চল্য ছড়িয়েছে। আজ দুপুরে স্থানীয়রা দুর্গন্ধ পেয়ে পুলিশে খবর দেয়। কাশী বোস

লেনের মত ব্যস্ত জায়গায় কিভাবে দেহটি এল, তা নিয়ে প্রশ্ন উঠেছে। ময়না তদন্তের জন্য দেহটিকে পাঠানো হয়েছে।

বিদ্যুৎ চালিত ভোগ্য পণ্যের ব্যবহার এবং তাপবিদ্যুৎ উৎপাদন কমাতে না পারলে জলবায়ুর পরিবর্তন এর সমস্যা মোকাবিলা করা সম্ভব নয় বলে মতপোষণ করেছেন আইআইটি মুম্বাইয়ের অধ্যাপক চেতন সিং সোলাঙ্কি। বিড়লা ইন্ডাস্ট্রিয়াল এন্ড টেকনোলজিক্যাল মিউজিয়ামে আজ “জলবায়ু পরিবর্তন সম্পর্কে ধারণা এবং প্রতিরোধমূলক পদক্ষেপ” শিরোনামে বক্তব্য রাখতে গিয়ে সোলার ম্যান এবং সোলার গান্ধী হিসেবে পরিচিত এই অধ্যাপক বলেন, যেকোনো ভাবেই কার্বন নিঃসরণের মাত্রা শূন্যে নামিয়ে আনতে হবে।

বাইট ডঃ সোলাঙ্কি।

আর্থ ডে নেটওয়ার্কের সহযোগিতায় আজকের অনুষ্ঠানে কলকাতা ও জেলার অসংখ্য ছাত্র-ছাত্রী অংশ নেয়। অন্যদের সঙ্গে বক্তব্য রাখেন মিউজিয়ামে ডিরেক্টর ডঃ শুভব্রত রায় চৌধুরী।

নেপালি কবি ভানু ভক্ত আচার্যর জন্মবার্ষিকী উপলক্ষে রাজ্য সচিবালয় নবান্নে আজ তার ছবিতে মালা দিয়ে শ্রদ্ধা জানান মন্ত্রিসভার সদস্য অরুণ রায়। কবির জন্মবার্ষিকী উপলক্ষে মুখ্যমন্ত্রী মমতা ব্যানার্জিও নিজের এক্স হ্যাণ্ডেলে তার প্রতি শ্রদ্ধা জানিয়েছেন।

মরসুমের প্রথম ডার্বি জিতলো ইস্টবেঙ্গল। যুব ভারতী ক্রীড়াঙ্গনে আজ প্রিমিয়ার ডিভিশন লীগের ম্যাচে ইস্টবেঙ্গল ২-১ গোলে মোহনবাগান সুপার জায়ান্টকে হারিয়ে দিয়েছে। বিরতিতে খেলা গোলশূন্য ছিল। ইস্টবেঙ্গলের পক্ষে পি ভি বিষ্ণু ও জেসিন টি কে গোল করেছেন। মোহনবাগানের পক্ষে সুহেল ভাট গোল করেছেন। ইস্টবেঙ্গল টানা তৃতীয় ম্যাচ জিতলো। অন্যদিকে প্রথম দুটি ম্যাচে ড্র করার পর মোহনবাগান পরাজিত হলো। উল্লেখ্য, এবার কলকাতা ফুটবল লিগের ডার্বির ১০০ বছর। দুই চিরপ্রতিদ্বন্দ্বী দলের ম্যাচকে ঘিরে ফুটবল প্রেমীদের মধ্যে উন্মাদনা ছিল তুঙ্গে।
